

## DOMENIE II DI AVENT

### Antifone di jentrade cf. Is 30,19.30

**P**opul di Sion,  
il Signôr al vignarà a salvâ i popui  
e al fasarà sintî la sô vôs tremende  
pe gjonde dal vuestri cûr.

**No si dîs** Glorie a Diu.

### Colete

Diu onipotent e bon di cûr,  
fâs che nissune robe di chest mont nus inderedi  
te nestre corse viers di to Fi,  
ma la scuele de sapience dal cîl nus fasi mertâ di spartî la sô glorie.  
Lui che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Ba 5,1-9

**Diu al pandarà in te il so sflandôr.**

Dal libri dal profete Baruc  
Met vie, Jerusalem, la munture dal corot e dal aviliment,  
e vistissiti cul sflandôr de glorie  
di Diu par simpri.  
Metiti intor la manteline de justizie che e ven di Diu,  
metiti sul cjâf la corone de glorie dal Eterni.  
Di fat Diu al pandarà il to sflandôr  
a ogni creature che e je sot dal cîl.  
Diu ti clamarà par simpri:  
“Pâs de justizie e Glorie de remission”.  
Jeve sù, Jerusalem,  
metiti adalt e cjale a soreli jevât:  
Ve i tiei fîs,  
dâts dongje di soreli a mont fin a soreli jevât,  
pe peraule dal Sant,  
in gjonde pal ricuart di Diu.  
A son partîts di te a pît, sburtâts dai nemîs;  
però tai torne a menâ dongje Diu,  
puartâts cun glorie tant che suntune sente di re.  
Di fat Diu al à destinât di sbassâ  
ogni mont alte e i çucs eternis,  
e di colmâ i riui splanant il teren,  
par che Israel al ledi indenant sigûr  
sot de glorie di Diu.  
Ancje i boscs i fasin ombrene a Israel  
e ogni arbul cjamât di vert, al comant di Diu.  
Di fat Diu al menarà Israel cun gjonde  
te lûs de sô glorie  
cun chel boncûr e cun chê justizie  
che a vegnin di lui.

Peraule di Diu.

### SALM RESPONSORIÂL dal Salm 125

**R.** Grandis robis al à fatis il Signôr par nô.

Cuant che il Signôr al à tornât a menâ dongje i presonîrs di Sion,  
nus pareve di insumiâsi.

In chê volte o vevin duçj bocje di ridi,  
e la nestre lenghe e cjantave di gjonde. **R.**

In chê volte fra i forescj a disevin:  
«Il Signôr al à fatis par lôr robononis!».  
Il Signôr al à fat par nô robononis:  
cetant contents che o jerin! **R.**

Torne a meti in sest il nestri destin, Signôr,  
come i riui che tal Negheb a scorin.  
Chei che vaint a semenin,  
a seselaran plens di gjonde. **R.**

Chel che al puarte la semence di butâ  
biel lant al vai;  
invezit al torne indaûr dut legri  
chel che i siei balçûi al puarte. **R.**

### SECONDE LETURE Fil 1,4-6.8-11

**O vês di jessi monts e cence magle pe zornade di Crist.**

De letare di san Pauli apuestul ai Filipês

Fradis, in ogni mê supliche o prei simpri cun gjonde par duçj vualtris, parcè che o vês dade une man al vanzeli de prime di fintremai cumò. O soi sigûr che chel che al à scomençade fra di vualtris cheste vore cussì grande le puartarà al colm fin te zornade di Crist Jesù. Di fat Diu mi è testimoni dal grant afiet che o ài par duçj vualtris tal amôr di Crist Jesù. Us domandi dome chest: che il vuestri amôr al cressi simpri di plui te cognossince e in ogni sorte di esperience, par che o podês preseâ lis robis plui bielis e cussì jessi monts e cence magle pe zornade di Crist, incolms dal prodot de justizie che si à midiant di Jesù Crist, a glorie e laude di Diu.

Peraule di Diu.

### CJANT AL VANZELI Lc 3, 4.6

**R.** Aleluia, aleluia.

Prontait la strade pal Signôr;  
splanait i siei trois!  
Ogni om al viodarà la salvece di Diu.

**R.** Aleluia.

### VANZELI Lc 3,1-6

**Ogni om al viodarà la salvece di Diu.**

Dal vanzeli seont Luche

Al jere l'an cuindicesim dal ream di Tiberi Cesar: Ponzi Pilât al jere governadôr de Judee, Erode al jere tetrarche de Galilee e so fradi Filip de Ituree e de Traconitide; Lisanie al jere governadôr de province di Abilene, intant che Ane e Caife a jerin i sorestants dai predis. In chel fratimp la peraule di Diu i rivà a Zuan, fi di Zacarie, tal desert. Alore lui al passà dute la region dal Jordan, predicjant un batisim di conversion pal perdon dai pecjâts. Si colmà cussì ce che al è scrit tal libri des sentencis dal profete Isaie:

“Ve, une vês e berle tal desert:

Prontait la strade pal Signôr,  
splanait i siei trois!  
Lis concjis che a sedin colmadis,  
lis monts e lis culinis che a sedin sbassadis;  
lis stradis stuartis che a sedin dreçadis,  
i lûcs grumbulôs splanâts.  
Ogni om al viodarà la salvece di Diu”.  
Peraule dal Signôr.

**Si dñs** O crôt.

### **Su lis ufiertis**

Lassiti bonâ, Signôr, des preieris e des ufiertis  
che ti fasìn te nestre puaretât,  
e là che no rivin i nestrìs merits, che no 'nt vin,  
vegninus incuintri cul jutori de tô misericordie.  
Par Crist nestri Signôr.

### **Antifone a la comunion Ba 5,5; 4,36**

Jeve sù, Jerusalem e metiti adalt:  
viôt la gjonde che ti ven dal to Diu.

### **Daspò de comunion**

Sostentâts cu la bocjade che e nudrìs la nestre anime,  
ti preìn, Signôr, di insegnânus,  
midiant de partecipazion a chest misteri,  
a pesâ cun sintiment lis robis di cheste tiere  
e a tacâsi a chês dal cîl.  
Par Crist nestri Signôr.